



ҰЛТ ТІЛІНІҢ  
КӨКЖИЕГІН  
КЕҢЕЙТУ ПАРЫЗ

4-бет



ТАТУЛАСУ  
РӘСІМІНДЕ  
ЖЕҢІЛГЕН ТАРАП  
БОЛМАЙДЫ

6-бет



АР СОТЫ

8-бет

# ЗАН газеті

✉ zangazet@mail.ru

№9 (3540) 3 ақпан 2023



ZANMEDIA.KZ

Қоғамдық-саяси, құқықтық газет

ҚАБЫЛДАУ

## СУДЬЯЛАРДЫ ІРІКТЕУ ІСІ ЖЕТІЛДІРІЛЕДІ



Мемлекет басшысы Жоғары сот кеңесінің төрағасы Денис Шиппті қабылдады. Кездесу барысында Президентке Жоғары сот кеңесінің 2022 жылы атқарған жұмыстарының қорытындысы, еліміздегі судьялар корпусының жай-күйі және оның тапсырмаларының іске асырылу барысы туралы мәлімет берілді.

Жоғары сот кеңесі төрағасының айтуынша, судьялар корпусының құрамын қайта жаңарту мақсатында қабылданған шаралардың нәтижесінде былтыр судьялық қызметке ұсынылған адамдардың саны сот жүйесінен кеткен судьялардың санынан асып түскен.

Мемлекет басшысының сот жүйесіне нақты сала мамандарын тарту жөнінде берген тапсырмасын орындау үшін алғаш

рет жекелеген құқық салаларындағы заңгерлер арасында конкурс өткізілді. Конкурс жеңімпаздары аудандық деңгейді айналып өтіп, бірден облыстық соттың судьялары бола алады.

Бұдан бөлек, Президентке кестені институционалды тұрғыда нығайтуға және оның құзыретіне соттардың кадрлық мәселелерін беруге, сондай-ақ судьялардың тәртіптік жауапкершілігі институтын жетілдіруге бағытталған жоспар туралы баяндалды. Сонымен қатар судьяларды іріктеу ісін жетілдіру және оның ашықтығы мен тиімділігін қамтамасыз ету жұмыстары жалғасады. Кездесу соңында Мемлекет басшысы бірқатар нақты тапсырма беріп, сот жүйесіндегі реформаларды сапалы жүзеге асыру қажеттігін атап өтті.

АҚОРДА.КЗ

СӨТІ ТҮСКЕН СҰХБАТ

Бектас БОСТАНОВ,  
Қазақ ұлттық қыздар педагогикалық университетінің қауымдастырылған профессоры:

### «БІЗДЕГІ ҰЛТШЫЛДЫҚТЫҢ ДЕНГЕЙІ - 15 ПАЙЫЗ»

– Бектас Ғаниұлы, Алаш арыстары өткен ғасырдың басында «бізді ұлтшыл қылған нәрсе – біздің кемдікте, қорлықта жүргендігіміз, көрінгеннен соққы жегендігіміз» деген екен. Біздің қазіргі қайраткерлерімізді ұлтшыл қылған не нәрсе?

Кейінгі кезде шығып жатқан кейбір азаматтардың ұлтшылдығына, айтып жүрген әңгімелеріне көңілім толады. Бізді ұлтшыл қылған нәрсе қазақ өз алдына дербес ел болғаннан бастап маңдайымыздан кетпеген нәубеттер. Қай заманда болсын, қасымызға кім келмесін оларға не істеп қойғанымызды білмеймін, бәрі қазақты қыруға тырысқан ғой. Бұл қонағын құдайындай сыйлап, кең пейілін көрсетіп төріне шығарған меймандостығынан шығар, бәлкім. Осы жалпақшеуешіліктің бәрі маңдайына таяқ болып тисе де, одан сабақ алмадық. Ол кезде қазіргідей жер тарлығы болмады, адам саны да көп болған жоқ қой. Соның өзінде көрші елдер қазаққа не істемеді.

Ал қазір қазақты құртуға қызығатын нәрсе өте көп. Адам санының көбеюі мен жер ресурсының азаюы өзгелерді қазақтың жер астындағы байлықтарына қызықтыруда. Кішкентай халық сонша жерді қалай иемденіп отыр? Бізде неге ол нәрсе жоқ деген қызғаныш бар. Одан кейін осалдығымыз ба білмеймін, бізді отарлаушылар әрдайым еңсемізді көтертпей, төменшіктетіп, мүмкіндігімізді пайдалануға қажетті білімді бермеді, қай заманда болмасын жақсы білім бермеуге тырысты. Жасыратыны жоқ, Ресейге қосылмай тұрғанда да мемлекет болып қалыптасқанымыз шамалы. Одан кейін де ешкім қазақты көтерген жоқ. Құл деп айтпаса да құлдың ісін істетті. Кеңестік дәуірде де бүкіл өндірісіміздің табысын өзгелерді бағуға жұмсадық. Мәскеудегі халық шаруашылығы көрмесінде әрбір республикаға бөлінген павильондар бар. Оның алдында тұрған мүсіндерде ұлттық киім киген қыздардың қолына өз елдерінде өндірілген өнімін ұстатып қойған.

(Соңы 5-бетте)

МӘСЕЛЕ

## ЕҢБЕК ҚҰҚЫҒЫН ҚОРҒАУ ӨЗЕКТІ

БҰҰ-ның Нью-Йорктегі штаб-пәтерінде ақпанның 6-15 күндері БҰҰ-ның Әлеуметтік даму жөніндегі комиссиясының (CSocD61) 61-сессиясы өтеді. Онда COVID-19 пандемиясынан қалпына келтіруді жеделдету және тұрақты дамудың 2030 күн тәртібін толық іске асыру үшін теңсіздіктерді еңсеру тәсілі ретінде барлығына толық және өнімді жұмыспен қамтуды және лайықты жұмысты құру жайы қарастырылады.

163 елді біріктіретін Халықаралық кәсіподақтар конфедерациясы (ITUC) жыл сайын сәуірден наурызға дейінгі заңбұзушылықтарға талдау жасап, Еңбекшілер құқығын сақтаудың ғаламдық индексын жариялайды. Онда Халықаралық еңбек ұйымының конвенцияларындағы жұмысшылардың құқықтарын қаншалықты мойындап және олардың қорғалуын қаншалықты талап ететіні сарапталады. Бұл құқықтарға мәжбүрлі және балалар еңбегіне

тыйым салу, сондай-ақ кәсіподақтар құру және ұжымдық келісімдер жасау құқығы кіреді. Индексте көрсеткіштеріне қарай 1-ден 5-ке дейінгі шкала бойынша елдердің рейтингі жасалады. Атап айтқанда 1 – кездейсоқ құқықтардың бұзылуы; 2 – құқықтарды қайталап бұзу; 3 – құқықтардың тұрақты түрде бұзылуы; 4 – құқықтардың жүйелі түрде бұзылуы; 5 – құқықтарға кепілдік жоқ; +5 – байланысты құқықтардың кепіл-

діктері жоқ дегенді білдіреді. Мәселен, 2020 жылы Қазақстан 144 мемлекеттің арасында құқықтарға кепілдік жоқ 32 мемлекеттің ішінде жұмысшылар үшін ең нашар он елдің (Бангладеш, Бразилия, Гондурас, Египет, Зимбабве, Үндістан, Қазақстан, Колумбия, Түркия және Филиппин) қатарында аталды. Былтырғы индексте ең нашар ондыққа болмағанымызбен (Бангладеш, Беларусь, Бразилия, Колумбия, Египет, Эсватини, Гватемала, Мьянма, Филиппин, Түркия) құқықтарға кепілдік жоқ 44 елдің қатарында тағы да қалып қойдық. Ал еңбек құқықтары кездейсоқ бұзылатын Швеция, Норвегия, Финляндия, Дания, Исландия, Германия, Австрия, Италия, Ирландия деңгейіне жету әзірге арман боп қалатын сияқты.

### Еңбекақы төлеуде түйткіл көп

Бас прокуратураның мәліметіне қарағанда, былтыр прокурорлар уәкілетті мемлекеттік органдармен бірлесіп 68 кәсіпорынның 4 мың қызметкердің алдындағы 1,5 млрд теңге сомадағы жалақы бойынша борыштарын өтеуін қамтамасыз етті. Ал оның 1,1 млрд теңгеден астамы алғашқы жартыжылдықта жүзеге асқан. Мысалы, «Тамыр» ЖШС компаниялар тобы 243 қызметкерге 60 млн теңге қарыз болған. Солтүстік Қазақстан облысы прокуратурасының ұсынуы бойынша кәсіпорынмен қарыздар толығымен төленіп, ал жұмыс беруші ӘҚБТК-нің 462-бабының 3-бөлігі бойынша әкімшілік жауапқа тартылған.

Еңбек құқықтарының қорғалуында шетелдік жұмыс күшін тартатын субъектілердің де тура жолдан таятын кездері аз емес. Ондағы ең көп таралған заңбұзушылық – отандық және шетелдік мамандардың еңбегіне ақы төлеудің теңгерімсіздігі болып отыр. Бұл бағытта анықталған заңбұзушылықтар бойынша 66 ұсыныс енгізіліп, 228 адам әкімшілік жауапкершілікке тартылды.

(Соңы 3-бетте)

Маңғыстау облыстық соты

«2023 ЖЫЛ – САПА ЖЫЛЫ»



Маңғыстау облыстық сотында 2022 жылғы сот төрелігін жүзеге асыру қорытындылары бойынша кеңейтілген мәжіліс өткізілді.

Мәжілісте облыстық сот төрағасы Бек Әметов сот төрелігіне деген қоғамның сенімін арттыру маңызды екеніне тоқталып, судьялардың жауапкершілігін арттыру, істерді сапалы қарау, мемлекеттік тілдің қолданысын кеңейту, бірыңғай сот тәжірибесін қалыптастыру мәселелеріне тоқталды. Сондай-ақ, төраға ұсынысымен «2023 жыл – сапа жылы» деп жарияланды.

Іс-шарада өңірдегі сот төрелігін сапалы атқару, заңдылықты сақтау, соттардың жұмысын одан әрі жетілдіру мәселелері бойынша алқа төрағалары, арыз-шағымдар бойынша сот әдеби жөніндегі комиссия төрағасы, БАҚ-пен бірлестікте атқарылған жұмыстар бойынша судья-координатор, Маңғыстау облысы бойынша Соттар әкімшісінің басшысы баяндама жасады.

Есепті кезеңде 1757 тұлғаға қатысты 1525 қылмыстық іс аяқталған (2021 ж. – 1999 тұлғаға қатысты 1752 қылмыстық іс), яғни 227 іске азайған. Сондай-ақ, өңірде 10 тұлғаға қатысты ақтау үкімі шығарылған (Ақтау қалалық сотында – 4, Мұнайлы аудандық сотында – 1, қылмыстық істер жөніндегі мамандандырылған сотында – 5 (2021 ж. 7 тұлғаға қатысты). Өңірде сотталған әйел адамдар саны – 124 (2021 ж. 153), сыбайлас жемқорлыққа қатысты сотталғандар саны – 28, (2021 ж. - 37), есірткі немесе психотроптық заттарды

заңсыз дайындау, өңдеу, иемденіп алу, сақтау, тасымалдау, жөнелту немесе сатуға байланысты сотталғандар саны – 26 (2021 ж. – 28).

Осы уақыт ішінде сеніп тапсырылған бөтен мүлікті иемденіп алу немесе талан-таражға салу (2021 ж. – 13, 2022 ж. – 7), бұзақылық (2021 ж. – 47, 2022 ж. – 33), көлік құралын басқару құқығынан айырылған және алкогольдік, есірткілік және уытқұмарлық масаң күйдегі адамның көлік құралын басқаруы, сол сияқты көлік құралын басқаруды осындай адамға беру немесе көлік құралын осындай адамның басқаруына жол беру (2021 ж. – 92, 2022 ж. – 63) қылмысы азайған.

Облыс соттарында медиаторлармен 30 қылмыстық іс қаралып, сотталушылар жәбірленушілермен татуласуына байланысты қылмыстық іс өндірістен қысқартылған (2021ж. – 90 іс) яғни, 60 іске азайған.

2022 жылы 11632 тұлғаға қатысты 11626 әкімшілік құқық бұзушылық туралы істер аяқталған (2021 ж. – 10706 тұлғаға қатысты 10700), яғни әкімшілік құқық бұзушылық туралы істер саны 926-ға көбейген.

Одан әрі Маңғыстау облыстық сотының азаматтық істер жөніндегі сот алқасының төрағасы Г.Бақытжанова өңір соттарының азаматтық істер бойынша атқарылған жұмысын қорытындылап, есепті кезеңде 12507 азаматтық іс қаралып аяқталғанын (2021 ж. – 13233), яғни істер 726-ға азайғанын жеткізді. Сондай-ақ, алқа төрағасы дауды соттан тыс реттеу және сотқа дейінгі баламалы институттарды тиімді қолдану, талап қоюды қабылдау кезеңінде мейлінше татуласу рәсімдерінің мүмкіндіктерін пайдалану аяқталған істер көрсеткішінің төмендеуіне әкелетінін айтып, өткен жыл қорытындысымен татуласу рәсімдері бойынша Маңғыстау облыстық соты республика бойынша 2-орында екенін алға тартты. Атап айтсақ, есепті кезеңде 2032 іс татуластыру рәсімдерін қолдану арқылы қысқартылған, оның ішінде 1275 (2021 ж. – 1550) іс медиация тәртібімен, 752 (2021ж.

– 233) іс татуласу келісімімен және 5 (2021ж. – 2) іс партиципативтік келісімге келу арқылы қаралған.

Кеңейтілген мәжілісте әкімшілік істер жөніндегі сот алқасының төрағасы Исатай Смаатов «Әкімшілік талап қоюлар күннен-күнге ұлғаюда, сондықтан судьялар өздерінің кәсіби деңгейін арттырып, жария-құқықтық қатынастарда жеке және заңды тұлғалардың құқықтары мен заңды мүдделерін тиімді түрде қорғау және қалпына келтіру мақсатында әкімшілік істерді әділ, бейтарап және уақытылы шешуі тиіс», – деді.

Алқа төрағасы 2022 жылы Маңғыстау облысының соттарына барлығы 784 әкімшілік талап қою түскенін (МАӘС – 745, жалпы соттарға – 39) мәлімдеп, оның ішінде, сот орындаушыларының әрекеттеріне (әрекетсіздігін) дау айту, салық, жер, мемлекеттік сатып алу санатындағы даулар бойынша талап қою басым түскенін жеткізді.

Маңғыстау облысы бойынша Соттар әкімшісінің басшысы А.Калпаков қатысушыларға ағымдағы жылы Сот әкімшілігі туралы ереже бекітілгенін, сот әкімшілігі саласында мемлекеттік саясатты қалыптастыру, сот төрелігін тәуелсіз жүзеге асыру үшін қажетті жағдай жасау, сот жүйесін және сот қызметін жетілдіруге бағытталған жүйелі реформаларды әзірлеу сот әкімшілігінің негізгі міндеті болып табылатынын атап өтті. Сондай-ақ, ол өңірде цифрландыруды дамытудың жоғары деңгейі қамтамасыз етіліп, 2022 жылы 8565 іс дыбыс-бенежазбамен қаралғанын айтты.

Іс-шара соңында Б.Әметов айтылған сын-ескертпелерді жойып, қатысушыларға құқық үстемдігі қағидатын қатаң сақтап, сот істерін қарау кезінде созбалаңға салу және судьялардың әдеп нормаларын бұзу фактісіне жол бермеуді қатаң ескертті. Сонымен бірге, сот төрелігіне жүктелген міндеттерді сапалы жүзеге асыруға шақырды.

Маңғыстау облыстық сотының баспасөз қызметі

Қызылорда облыстық соты

ТАТУЛАСТЫРУ БОЙЫНША НӘТИЖЕ ЖОҒАРЫ

Қызылорда облыстық соты мен Соттар әкімшісінің 2022 жылдың қорытындысы бойынша бұқаралық ақпарат құралдарының қатысуымен баспасөз-конференциясы өтті.

Облыстық сот төрағасы Әділхадиди Шығамбаевтің айтуынша есепті кезеңде соттардың өндірісіне 1060 қылмыстық іс, 12686 әкімшілік құқық бұзушылықтар туралы іс, 18 457 талап қою, 516 азаматтық іс, 825 әкімшілік іс түскенін, медиация тәртібімен 111 қылмыстық іс, 1890 азаматтық іс, 94 әкімшілік іс медиациялық келісіммен аяқталса, татуласу келісімі негізінде 109 азаматтық, 2 әкімшілік іс, ал партиципативтік рәсім тәртібімен 22 азаматтық іс өндірістен қысқартылғанын айтты. Татуласу шаралары 2021 жылмен салыстырғанда біршама артқан.

Қазіргі таңда сот жүйесінің ашықтығы толығымен қамтамасыз етілгенін, облыстық соттың сайтына, әлеуметтік желілердегі парақшаларында жаңалықтарды көруге болатынын, азаматтардың оңтайлы қызмет көрсетіп, кері байланыс орнату үшін call-орталық, әр соттарда whats`app мессенджері, телеграмм-бот, талап қою үлгілері жинақталған QR-код жұмыс жасап тұр.

Соттар әкімшісінің басшысы Сағатбек Сүлейменнің сөзіне қарағанда былтырғы төтенше жағдай режимінің салдарын жою бойынша ғимарат толығымен жөнделіп, сот жұмысы қалыпты режимге көшкен. Ғимаратты қалыпқа келтіру жұмысы он айда жүргізіліп, сот ғимаратының



іші-сырты, сот, мәжіліс залдары, дәліз, еден толығымен күрделі жөндеуден өтіп, жаңадан жиһаздар алынып, есік-терезе, шатыр, электр желісі, жылу, көріз жүйесі толығымен жаңартылды. Облыстық және қалалық соттың фронт-кеңселері қайта жасакталып, күту залы, анықтама бұрышы, жеке жұмыс жасау секторы, адвокаттар мен медиаторлар орны, кіріс кеңсесі, балалар ойын алаңқайы талапқа сай жасалды. Бірінші қабатқа LED-экран орналастырылды. Ол арқылы сотқа келуші азаматтар сот ақпараттарымен, талап арыз үлгілерімен, сот басшылығының азаматтарды жеке қабылдау кестесімен таныса алады.

Шара соңында баспасөз өкілдері жаңартылған сот ғимаратын аралап, сот залдарымен, фронт-кеңсе жұмысымен, сот мұражайымен танысты.

Қызылорда облыстық сотының баспасөз қызметі

ҚҰҚЫҚ

Қарағанды облыстық соты

МЕМЛЕКЕТТІК ТІЛДІҢ ҚОЛДАНЫСЫНА ТЕРЕҢ МӘН БЕРІЛМЕК

Қарағанды облыстық сотындағы кеңейтілген отырыс өңір соттарының 2022 жылғы жұмыс қорытындыларын таразылауға арналды. Іс-шараны облыстық сот төрағасы Ерден Әріпов ашып, қатысушыларды кеңейтілген отырыс бағдарламасымен таныстыра келе, сот төрелігін жүзеге асыру сапасын жақсарту және бірыңғай сот тәжірибесін қамтамасыз ету бойынша бірқатар нақты міндетті атап өтті.



Жиында қылмыстық істер жөніндегі сот алқасының төрағасы Рашид Нұрмағамбетов қылмыстық істер бойынша сот төрелігін жүзеге асыру қорытындыларына жан-жақты тоқталды. Бірінші сатыдағы соттар мен апелляциялық сатыда сот төрелігін жүзеге асырудың сандық және сапалық көрсеткіштері туралы азаматтық істер жөніндегі сот алқасының төрағасы Шахатбек Әдіров пен әкімшілік істер жөніндегі сот алқасының төрағасы Мұрат Туғанбаев хабардар етті. Әрі қарай судьялардың әрекеттеріне жеке және заңды тұлғалардың өтініштерін қарау тобының жетекшісі Саят Оразбаев баяндама жасады.

Е.Әріпов 2023 жылы сот корпусының алдында бірнеше басым міндет тұрғанын, оны жүзеге асыру аясында үлкен бірлескен жұмыс атқару қажеттігін мәлімдеді. Яғни, бірыңғай сот тәжірибесі, бірінші және апелляциялық саты соттарының сот төрелігін жүзеге асыру сапасын жоғарылату, сот актілерін сапалы және уақытылы дайындау, татуластыру рәсімдерін қолданудың тиімділігі және төменгі сатыдағы соттарға тәжірибелік көмек көрсету сияқты міндеттер қойылды. Төраға сондай-ақ бітімгершілік рәсімдерін дамыту жұмыстарын әрі қарай жалғастыруды, қылмыстық, азаматтық және әкімшілік сот ісін жүргізуде мемлекеттік тілді қолдану аясын кеңейту бойынша одан әрі белсенді жұмыс жүргізу қажеттігін баса айтты.

Қарағанды облыстық сотының баспасөз қызметі

Батыс Қазақстан облыстық соты

БІРЫҢҒАЙ ТӘЖІРИБЕ ҚАЛЫПТАСТЫРУ МАҢЫЗДЫ



қаулы өзгертілді). Медиатордың қатысуымен 485 іс қаралды.

Облыс соттары 2022 жылы 1355 қылмыстық істі аяқтады (2021 ж. – 1407).Үкім шығарумен барлығы1163 қылмыстық іс қаралды (2021 ж. – 1163). Есептік кезеңде 1297 адам сотталды, оның ішінде 527 адамға қатысты бас бостандығынан айыру түрінде жаза тағайындалды. Қылмыстың аса ауыр түрлері бойынша барлығы 42 адам бас бостандығынан айырылды (2021 жылы – 54, бас бостандығынан айыруға – 53). Апелляциялық сот алқасы көрсетілген кезеңде 3 адамға қатысты 5 үкімнің күшін жойды (2021 ж. – 3). 43 адамға қатысты 28 үкім өзгертілді (2021 ж. – 27).

2022 жылы сыбайлас жемқорлық сипатындағы қылмыстар үшін барлығы 17 адам сотталды, оның ішінде 12 адамға қатысты 39 206 360 теңге сомасына айыппұл түрінде жаза тағайындалды, 4 адам бас бостандығынан айыру және 1 адам бас бостандығын шектеу жазасына кесілді.

Былыр 996 әкімшілік іс келіп түсті. Істердің ең көбі Батыс Қазақстан облысының МАӘС-ке түскен. Шешім шығарумен 350 іс қаралды, оның ішінде МАӘС-те 322 іс. 413 өтініш қайтарылды, 118-і татуласумен аяқталды, дауды медиация тәртібімен реттеу туралы келісім жасалуына байланысты – 38 іс, соттылығы бойынша 12 іс жолданды.

Әкімшілік істер жөніндегі апелляциялық алқа 2022 жылы 294 әкімшілік істі қарады, 5 іс қайтарылды, 2 іс бойынша шағым қайтарып алынды, есепті кезеңнің соңына қалғаны – 8 іс.

Кеңес барысында Батыс Қазақстан облысы бойынша Соттар әкімшісінің басшысы М.Кенжалиев статистикалық деректер мен облыс соттарында атқарылған жөндеу жұмыстары туралы баяндады. Ол сот актілерінің уақытылы салынбауы, процессуалдық мерзімнің бұзылуы, арыздың уақытылы тіркелмеуі мен бөлінуі, атқарушылық құжаттардың орындауға мерзімі бұзылып жіберілуі және сот отырысының уақытылы өтуі туралы айтты.

Сондай-ақ, соттардың алдына сот төрелігін жүзеге асыру сапасын жақсарту және бірыңғай сот практикасын қамтамасыз ету, төрешілік этикасының нормаларын сақтау қажеттілігі бөлігінде бірқатар басым міндеттер қойды.

Батыс Қазақстан облыстық сотының баспасөз қызметі

ҚҰҚЫҚТЫҚ КӨМЕК



## 1414 ТЕГІН КЕҢЕС БЕРУГЕ ДАЙЫН

Енді ел азаматтары 1414 нөмірі бойынша құқықтық сұрақтар бойынша тегін көмек ала алады.

ҚР Әділет министрлігі халыққа қолайлы жағдай жасау мақсатында ҚР Цифрлық даму, инновациялар және аэроғарыш өнеркәсібі министрлігімен бірлесіп Digital Justice жобалар портфелі шеңберінде кезекті қызметті іске қосады.

Бірыңғай байланыс орталығының базасында 1414 нөмірі бойынша консультациялық көмек азаматтарға мемлекеттік қызмет көрсету мәселелері бойынша ғана емес, сонымен қатар білікті мамандардан заң мәселелері бойынша да кеңес беріледі.

Осыған байланысты, кез келген адамның оңай есте қалатын 1414 нөміріне қоңырау шалуына болады. Қазақстан бойынша барлық ұялы байланыс операторына және стационарлық телефондар арқылы қоңырау шалу тегін.

Әділет министрлігінің баспасөз қызметі

НАРЫҚ ПЕН ХАЛЫҚ

## ӘЛЕУМЕТТІК АЗ ҚАМТЫЛҒАН ТОП МҮДДЕСІ АЛДЫҢҒЫ ОРЫНДА



Соңғы жылдары әлемдегі нарықтық ахуал күрделене түсті. Әлемнің даму бағыты экономиканы түрлендіру, жаңа инновация, жүйеленген инвестиция, пәрменді интеграция мәселелеріне ойысты. Әр мемлекет өзінің ішкі және сыртқы нарықтағы орнын айшықтады. Ол ең алдымен халқының экономикалық, әлеуметтік ахуалы бойынша сараланды. Осы ретте, Қазақстанда замана ағысына ілесіп отырып, елдің ішкі ахуалын, оның ішінде әлеуметтік-экономикалық статусын алдыңғы орынға шығарды.

Халықтың әл-ауқаты мен күнкөріс деңгейі, әлеуметтік төлемдер мен мемлекеттік мүмкіндіктері таразыланды. Төлем қабілеті төмен, қоғамдағы әлсіз топтар да мемлекет назарынан тыс қалмады. Мәселен, 2022 жылы 440 млрд теңгеден астам сомаға қазақстандықтарға мүгедектік және асыраушысынан айырылу бойынша жәрдемақы төленіпті.

Статистика агенттігінің мәліметінше, 2022 жылдың қаңтар-желтоқсан айлары аралығында республикалық бюджеттен мүгедектігі бойынша мемлекеттік әлеуметтік жәрдемақы төлеуге 341 млрд-тан астам теңге, асыраушысынан айырылу жағдайы бойынша – 99,9 млрд теңге жұмсалған. Бұл көмек биылғы жылы да еселенгені байқалады. Ресми мәліметтер бойынша, 2023 жылғы 1 қаңтардағы жағдай бойынша мүгедектігі бойынша мемлекеттік әлеуметтік жәрдемақы алушылардың саны шамамен 538,6 мың адам, ал асыраушысынан айырылу жағдайы бойынша – шамамен 189,9 мың адам болған.

Бұл бағыт бойынша ҚР Үкіметі алдында атқарылуы тиіс ауқымды жұмыстар тұр. Жақын арада тиісті министрлік мүгедектігі бойынша мемлекеттік әлеуметтік жәрдемақылардың мөлшерін мүгедектіктің тобына және себебіне, сондай-ақ тиісті қаржы жылына арналған «Республикалық бюджет туралы» заңда белгіленген ең төменгі күнкөріс деңгейінің шамасына байланысты анықтамақ. Асыраушысынан айырылу жағдайы бойынша да мемлекеттік әлеуметтік жәрдемақының мөлшері қайтыс болған (қаза тапқан) асыраушының асырауындағы адамдардың санына, қайтыс болу себептеріне және ең төменгі күнкөріс деңгейіне байланысты болады.

2023 жылғы 1 қаңтардан бастап мүгедектігі бойынша және асыраушысынан айырылу жағдайы бойынша мемлекеттік әлеуметтік жәрдемақылардың мөлшері ең төменгі күнкөріс деңгейінің ұлғаюына байланысты 8,5%-ға өсті. Мәселен, 2023 жылғы 1 қаңтардан бастап жалпы аурудан мүгедектігі бойынша мемлекеттік әлеуметтік жәрдемақы мөлшері 1-топ үшін – 77 889 теңгені, 2-топ үшін – 62 068 теңгені, 3-топ үшін – 42 190 теңгені құрайды.

2023 жылдың 1 қаңтарынан бастап күшіне енген «2023-2025 жылдарға арналған республикалық бюджет туралы» заңда ҚР мемлекеттік жастар саясаты және әлеуметтік қамсыздандыру саласына ерекше басымдық берілген. Бұл алдағы уақытта мүгедегі бар азаматтарға қолдау күшейетінінен хабар береді.

Ж.ҚҰДАЙБЕРГЕН

МӘСЕЛЕ

# ЕҢБЕК ҚҰҚЫҒЫН ҚОРҒАУ ӨЗЕКТІ

(Соңы. Басы 1-бетте)

72 млн теңгеге айыппұл салынып, әкімдіктермен 266 рұқсат қайтарып алынды және 150 шетелдік азамат елден шығарылған.

Еңбек жағдайларының қауіпсіздігі мәселелерінде прокурорлардың актілері бойынша 30 мың жұмысшыға жалақыға үстемеақы белгіленді. 600-ден астам қызметкерге өтемақы төленіп, қорғау құралдарымен және арнайы тамақпен кезең-кезеңімен қамтамасыз ету басталды. 22 бірлік жабдықтың жұмысы тоқтатылып, 226 адам әкімшілік жауаптылыққа тартылған.

Осы арада «Ештен кеш жақсы» дегендей, былтыр жалақы бойынша берешекті жедел өндіріп алу үшін деректер алмасу жолға қойылғанын да айта кеткен жөн шығар. Сондай-ақ дебиторлармен жұмыс жүргізіліп, борышкерлердің мүлкін іздеу жүріп жатыр.

Қазақстан еңбек құқығын қорғауда халықаралық конвенциялардың бәрін бірдей мақұлдап отырған жоқ. Еліміз қазіргі таңда іргелі 8, директивалық 4 конвенцияның ғана толық қатысушысы болып табылады. Ал техникалық 178 конвенцияның тек 12-сін ғана мақұлдап отыр.

Атап айтқанда іргелі конвенцияларға: № 29 Мәжбүрлі немесе міндетті еңбек туралы конвенцияны бекіту туралы (1932); № 87 Қазақстан Республикасының Ассоциация бостандығы және ұйымдастыру құқығын қорғау жөніндегі (1948); № 98 Ұжымдық келіссөздерді ұйымдастыру және жүргізу құқығы принциптерін қолдану туралы (1949); № 100 Құндылығы бірдей еңбек үшін еркектер мен әйелдерге бірдей сыйақы беру туралы (1951); № 105 Мәжбүрлі еңбекті жою туралы туралы (1957); № 111 Еңбек және кәсіптер саласындағы кемсітушіліктер туралы (1958); № 138 Жұмысқа қабылдау үшін ең төменгі жас туралы (1973); № 182 Балалар еңбегінің жаман түрлеріне тыйым салу және жою жөніндегі шұғыл шаралар туралы (1999) конвенциялар кіреді.



Директивалық конвенцияларға: № 81 Өнеркәсіп пен саудадағы еңбек инспекциясы туралы (1947); № 122 Жұмыспен қамту саласындағы саясат туралы (1964); № 129 Ауыл шаруашылығындағы еңбек инспекциясы туралы (1969); № 144 Үш-жақты консультациялар (халықаралық еңбек нормалары) туралы (1976) кіреді.

Ал Қазақстан қатысушысы болып табылатын техникалық конвенциялар ішінде: № 26 Ең төменгі жалақыны белгілеу рәсімін жасау туралы (1928); № 88 Жұмыспен қамту қызметін ұйымдастыру туралы конвенцияны бекіту туралы (1948); № 95 Жалақыны қорғау туралы (1949); № 135 Еңбекшілер өкілдері туралы (1971); № 148 Еңбекшілерді жұмыс орындарындағы ауаның ластануы, шу мен тербеліс салдарынан болатын кәсіби қауіптерден қорғау туралы (1977); № 155 Еңбек қауіпсіздігі мен гигиенасы және өндірістік орта туралы (1981); № 156 Отбасылық міндеттермен еңбек ететін еңбекші ерлер мен әйелдерге арналған тең қарау және тең мүмкіндіктер туралы (1981); № 162 Асбесті пайдалану кезінде еңбекті қорғау туралы (1986); № 167 Құрылыстағы еңбек қауіпсіздігі мен еңбек гигиенасы туралы (1988); № 183 Араны қорғау туралы 1952 жылғы (қайта қаралған) конвенцияны қайта қарау туралы (2000); № 185, 1958 жылғы конвенцияны қайта қарайтын теңізшілердің жеке күәліктері туралы (2003); № 187 Еңбек қауіпсіздігі мен гигиенасына жәрдемдесетін негіздер туралы (2006).

### Еңбек қауіпсіздігі және еңбекті қорғау кәсіподақ қызметінің басты бағыттары

2015 жылы қабылданған Еңбек кодексінің 203-бабына сәйкес:

1. Жұмыс берушінің және жұмыскерлердің не олардың өкілдерінің бастамасы бойынша 15 жұмыс күнінен аспайтын мерзімде Еңбек қауіпсіздігі және еңбекті қорғау жөніндегі өндірістік кеңес құрылады. Оның құрамына еңбекті қорғау жөніндегі техникалық инспекторларды қоса алғанда, жұмыс берушінің өкілдері, жұмыскерлердің өкілдері тепе-теңдік негізде.

2. Еңбек қауіпсіздігі және еңбекті қорғау жөніндегі өндірістік кеңестің құрамы жұмыс берушінің және жұмыскерлер өкілдерінің бірлескен шешімімен бекітіледі.

3. Еңбек қауіпсіздігі және еңбекті қорғау жөніндегі өндірістік кеңесті 2 жылда 1 рет мерзімділікпен ротациялық негізде жұмыс берушінің және жұмыскерлер өкілдерінің арасынан кеңес мүшелері сайлайтын төраға басқарады. Еңбек қауіпсіздігі және еңбекті қорғау жөніндегі өндірістік кеңестің шешімдері жұмыс беруші және жұмыскерлер үшін міндетті.

4. Еңбек қауіпсіздігі және еңбекті қорғау жөніндегі өндірістік кеңес жұмыс беруші мен жұмыскерлердің еңбек қауіпсіздігін және еңбекті қорғау талаптарын қамтамасыз ету, өндірістік жарақаттану мен кәсіптік аурулардың алдын алу жөніндегі бірлескен іс-қимылдарын ұйымдастырады, сондай-ақ еңбекті қорғау жөніндегі техникалық инспекторлардың жұмыс орындарында еңбек жағдайлары мен еңбектің қорғалуына тексерулер жүргізуін ұйымдастырады.

5. Еңбекті қорғау жөніндегі техникалық инспекторлар еңбек қауіпсіздігі және еңбекті қорғау жөніндегі өндірістік кеңестің шешімімен бекітіледі. Еңбекті қорғау жөніндегі техникалық инспекторлардың мәртебесі, құқықтары мен міндеттері, сондай-ақ олардың бақылауды жүзеге асыру тәртібі еңбек қауіпсіздігі және еңбекті қорғау жөніндегі өндірістік кеңестің шешімімен айқындалады.

Мемлекет басшысы былтырғы қыркүйектегі жолдауында: «Еңбекақыны нарықтағы жағдайға сай өсіру – халықтың әл-ауқатын арттырудың басты факторы. Мемлекет ең төменгі жалақыны айқындаудың жаңа тәсілін енгізеді. Бұл әдіс оның мөлшерін біртіндеп ұлғайтуға мүмкіндік береді. Мен ең төменгі жалақы деңгейін 60 мың теңгеден 70 мың теңгеге дейін көтеру туралы шешім қабылдадым. Бұл шешім 1,8 миллион азаматтың табысына тікелей әсер етеді» деген еді. Алайда елдегі инфляция табыс пен шығыстың арасындағы алшақтықты жоя алған жоқ. Сондықтан жыл бастала салысымен жер-жерде жұмысшылардың бейбіт наразылығы қайта жалғасып, өндіріс орындарындағы апатты жағдай жиілей бастады. Бұл кәсіподақ ұйымдарының еңбек қауіпсіздігі және еңбекті қорғау бағытындағы өз міндетін тағы да толық орындай алмай отырғанын көрсетті.

Ерлік ЕРЖАНҰЛЫ,  
«Заң газеті»

### Сіз не дейсіз?

**Айдос АБИХАНОВ, «PARYZ» Ұлттық жұмыс берушілер конфедерациясының директоры:**

– Қызметкерлердің еңбек құқықтарын бұзу фактілерінің барын жоққа шығаруға болмайды. Бұл ретте бақылау-қадағалау органдарынан басқа қызметкерлердің құқықтарын қорғау үшін әлеуметтік әріптестік сияқты механизм бар екенін атап өткен жөн. Бұл орталық және жергілікті деңгейдегі мемлекеттік органдардың өзара әрекеттесуі мен ынтымақтастығы. Қазақстанның әрбір өңірінде өңірлік жұмыс берушілер және әлеуметтік-еңбек қатынастарын реттеу жөніндегі үшжақты комиссиялар жұмыс істейді. Комиссиялар әлеуметтік-еңбек қатынастары тәуекелдерінің картасын мониторингтеу нәтижелері бойынша комиссияның қарауына еңбек құқықтарының бұзылуы (еңбек жағдайлары мен қауіпсіздігі, жалақыны уақытылы төлеу және т.б.) туралы мәселелерді шығарып отырады. Комиссия отырыстарына жұмысшылардың еңбек құқықтарын бұзған жұмыс берушілер шақырылады. Бұзушылықтарды жоюдың себептері мен мүмкіндіктері анықталады. Оларды жою үшін уақыт тағайындалады. Қабылданған шаралар бойынша жұмыс берушілер комиссияны орындау нәтижелері туралы хабардар етеді. Құқық бұзушылықтар негізінен шағын бизнесте көп кездеседі. Олар әлеуметтік серіктестік жүйесіне аз қатысады. Оларда жұмысшылардың мүдделері мен құқықтарын ұйымдасқан түрде қорғайтын кәсіподақтар жоқ. Жұмысшылар бір жағынан шашыраңқы, екінші жағынан олар кәсіподақ құрудың немесе салалық кәсіподақтарға кірудің жолын білмейді. Қазіргі уақытта конфедерация еңбек қатынастарын реттеу жөніндегі өңірлік комиссиялар қызметінің тиімділігін арттыру үшін өңірлермен және кәсіподақтармен жүйелі өзара іс-қимыл жасап отыр. Биыл кәсіподақтармен бірлесіп әлеуметтік әріптестік мүмкіндіктерін танымал ету және осылайша өртүрлі бұзушылықтар санының азаюына ықпал ету үшін өңірлерге баруды жоспарлап отырмыз.









